

الفاجومي

تحقيق معي برئاسة
السفـرجي الملكي

■ قلت للسفـرجي الملكي الذي يحقق معي: اطلب لنا
قهود من المصاريف السريه.. قال لي انت حرامي
وعينك قويه.
■ كرد فعل للتحقيق معي كتبت قصيدة «عصفور
وصياد».

oboiikan.com

المره الأولانيه عامل السويتش خد ظرف الفلوس من عند مدير مكتب أنور السادات وهو واقف.. لكن المره دى فوجئ بمدير المكتب بيحتفي بيه جداً ويقول له:
- دالسيد أنور السادات منتظرك عشان تشرب معاه قهوه. بدأ الفار يلعب فى عبه فوطن النفس على مجابهة الشدائد.

دخل المكتب لقي السيد أنور السادات بنفسه واقف يستقبله:

- هيه.. قهوتك ايه بقى..

- ساده..

- وانت إزيك؟!

- نحمده..

- وازي الليشى بيه؟..

- بخير يبوس إيد سعادتك.

- انت كنت معاه النهارده؟!

- أنا معاه كل يوم..

وبعد سلسله من الأسئلة التعذيبيه دخل الليشى بيه.. صاحبنا راح قايم مبوط فيه وقال له:

- أنا ف عرض حضره النبى يابيه..

قال له:

- انت تعرفنى

قال له:

- وهو فيه حد ما يعرفكش.. دانتو عماد البلد وأجدع ناس فيها.

- أنا بعثك تأخذ فلوس من هنا؟

- ما حصلش يا باشا...

- أmaal أيه اللي خلاك تعمل كده؟!

- الفقر ياليتي بيه.

- انت بتشتغل قين ياد؟

- فى عزبه يوسف بيه فى المنيل.. فى منظمه التضامن يعنى.

- طب وإزاي بتسرق وانت موظف؟!

- هو دا يا بيه مربوط الفرس.

واقترح الليثي بيه تحويل المتهم للنيابه، لكن السادات فضل الاتصال بيوسف بيه لإبلاغه بجريمة أحد رعاياه، وفعلاً تم الاتصال وكان رأى يوسف بيه هو التكتم على الموضوع وإرسال الشخص مع مخصوص، وبعد سيل من الشتائم والتهديد كتب يوسف بيه على المتهم وصل أمانه بمبلغ الخمسميت جنيه على أن تسدد خصماً من مرتبه بواقع جنيه كل شهر!! يعنى التمانيه جنيه اللي دعوه للسرقة حيقبوا سبعة وبعدين لازم يعيش. كمان خمسميت شهر عشان يسدد آخر قسط!! واحد من ولاد الحلال كبرها فى دماغ الواد وقال له:

- انت دوله إسلاميه؟

قال له:

- لأ.. أنا شخص مسلم.

قال له:

- خلاص خليه يملغوا النيابة.. هما مش حيقدرؤا..

فصاحبنا طلع ليوسف بيه وقال له:

- انتوا عايزين تخصصموا م التمانيه جنيه؟ دا يبقى كفر.. دانتوا تبقوا إنجليز..
وعلى الطلاق ما حد يخصم لى مليم لأبلغ الثيا به..

فقام يوسف بيه كل الواد قلمين غيظ وطرده من المنظمه وعينه فى "روز اليوسف"
بخمسه وعشرين جنيه. بعد الحكايه دى بأيام غاب الأستاذ محمد المصرى مندوب
المنظمه لدى هيئه البريد بسبب مرضه فانتدبونا انا ومحمد الأسوانى بدله. وفى أول
يوم رايعين مكتب البريد قلت لمحمد الأسوانى:

- ما تيجى نسرق ونتعين فى روز اليوسف بخمسين جنيه.

قال لى:

- نسرق إيه؟!

قلت له:

- نسرق طوابع.. هو يعنى الورق الزباله اللى بيعتوه ده له لازمه؟..

قال لى:

هب للنبي أرسلنا البريد من مكتب الملك الصالح، وعملنا الكشف على طريقة
شرفنطح طلع لنا جوز جنيهات، هو خد ذهب وأنا خدت ذهب، واستمرت
الحكايه دى أربع تيام كل يوم نطلع جوز جنيهات نفطر ونجيب الشاى والسجاير وفل
الفل، وفجأه فى اليوم الخامس لقيت محمد يقول لى:

- إحنا كده ماشيين فى طريق الهاويه.

قلت له:

- يا جدع كبر دماغك بلا هاويه بلا خرا.

قال لى:

- لا ياعم أنا مش جاى معاك.

قلت له:

- شوقك.

رحت البريد صدرت البوسته وطلعت لى جنينه لزوم الفطار والذى منه رجعت
المنظمه فوجئت بالأسوانى بيقوللى:

- حقی.

قلت له:

- جاك كسر حقك.

قال لی:

- يا تدينى حقى يا أروح أبلغ.

قلت له:

- مطرح ما تحت راسك حط رجليك.

ابن المجنوننه راح بلغ فعلاً وإذا بالدنيا تنقلب والقيامة تقوم وقوام قوام شكلوا لنا
لجنه تحقيق برئاسة السفرجى الملكى.. يا ولاد الكاااالب.. وسين وجيم ما عجبنش
طريقه التحقيق بتاعه السفرجى لأن الشمانه كانت واضحه فى أسئلته وطريقه تعامله
معانا.. قلت له:

- أطلب لنا قهوه من المصاريف السريه.

قال لی:

- انت حرامى وعينيك قويه.

قلت له:

- انت مين عينك محقق؟

قال لی:

- یوسف پیہ.

قلت له:

- يتعل أبوك لأبو اللي عينك.

ورحت قايم مروح على أساس إني ماارجعش المنظمه تاني.. وفي البيت لقتني
باكتب قصيده عصفور وصياد:

يا صياد الطيور يا خال

صباeck عن زناد الموت

دنا عصفور ضعيف الحال

ولا اكفیش عيالك قوت

عجبتني القصيده رحت كاتب منها نسخه وحاططها في ظرف وباعتها ليوسف
السباعي، تاني يوم فوجئت بيوسف شخصياً جاي لى البيت ومعاها السكرتير
الخصوصى، وخذنى فى عربيته ع المنظمه وفي مكتبه طلب لى قهوه وقعدنا نشربها
فى صمت وفجأه قال لى:

- انت شاعر مدهش.. القصيده جميله جميله جميله.. لكن تقصد مين

بالصقر؟!

قلت له:

- أقصد السفرجى الملكى..

فانفجر بالضحك وقال لى:

- اعتبر الموضوع منتهى وبكره تيجى تستلم شغلك..

قاعد فى مكتبى الفخم فى المنظمه باحل الكلمات المتقاطعه وإذ بالدكتور مرسى
يدخل على باسم المحيا ويقوللى:

- بليغ بيسلم عليك وبيرجوك تروح لجنه الإذاعه تصرح النص لأنه تقريباً انتهى

من اللحن.

يا عيني يا عيني... والله واتحقق الحلم وبقيت فنان مشهور يا فؤاد يا بن هانم..
مدد يا سيدى سليم يا ابو مسلم مدد يا بركة دعا الوالدين..

فى هذه الأثناء كان حصل لى شرف التعرف على شاعر الشباب أحمد رامى
بسبب قصيده عصقور وصياد اللى قراها مع الأستاذ يوسف السباعى فقال له:

- أنا لازم أشوف اللى كاتب القصيده دى.

ولما عرفت الكلام دا من الأستاذ حسين الخصوصى رحت قابلت الأستاذ رامى
فى مكتبه بالإذاعة، وقدمت له نفسى فرحب بى ترحيب شديد.. هو صحيح ما
طلبليش مشروب.. لكن نزلنا من الإذاعة واحنا مأنججين بعض.

كتبت النص بتاع قال ويقول.. كتبته بخط جميل وخذت إذن الساعه واحده،
وعلى مكتب رامى لقيته مش موجود قلت أسيب له النص ع المكتب لما ييجى بكره
يقراه ويصرحه.. فيها حاجه دى؟!!

بعدها بشهر باشوف البرامج فى مجله الإذاعة قريت خبر بيقول:

انتهى الملحن حلمى أمين من تلحين أغنيه كلام الناس للشاعر أحمد فؤاد نجم
وسينغنيها المطرب أسامه رءوف!!!

مين حلمى أمين؟ ومين أسامه رءوف؟ أنا ما سمعتش الاسمين دول قبل كده،
ودا طبعا نتيجة جهلى لكن أعمل إيه مع بليغ؟!

خذت بعضى ووحى للأستاذ رامى... أول ما شاف وشي قال لى:

- مبروك أنا صرحت لك النص ونازل ع الخريطه الأسبوع ده.

فى الأحوال العاديه بنى آدم مننا لما بيسمع خبر زى ده بتبقى الفرحه مش سايعاه
وبعضهم بيعتبرها مناسبه سعيده جديره بحفل يقام على شرفها وكل برغوت على قد
دمه.. إنما بقى العبد الفقير فهمها غلط لدرجة إن الأستاذ رامى قال لى:

- انت مش مبسوط ليه؟

شرحت له الموضوع وكان لسه شيطان الألاطه متلبسنى فقلت له:

- بصراحه النص دا أنا مفصله لأم كلثوم.

الراجل قال لى وهو مفهوش:

- أم كلثوم حته واحده؟!

قلت له:

- مش أقل

قال لى:

- طيب...

وبعد فتره صمت قال لى:

- إذا كنت مصمم على رأيك روح لأمين عبد الحميد.. وأنا ح أكلمه.. ما

كدبتش خبر.. وعلى مكتب أمين عبد الحميد اللى هو مراقب عام الموسيقى والغناء..

دخلت لقيت شخص ملوش ملامح باينه من كميه القرف اللى حاططها على وشه

صعب على دخلت آخذه بالحضن.. وهو قاعدع المكتب وإذا بيه بيتراجع وهو قاعد

مفزوع وقال لى:

- إيه ده؟ انت دخلت هنا إزاي..

قلت له:

- مش الأستاذ أمين عبد الحميد؟!

قال لى بعد ما هدى شويه:

- أيوه أنا.. وأنت مين!

قلت له:

- مش الأستاذ رامي كلمك؟

قال لي:

- كلمني في إيه؟ انت عايز إيه؟

رجعت شرحت الموضوع ثاني.. قال لي:

- يعني مش عاجبك حلمي أمين..

قلت له:

- الراجل أنا ماشفتوش والمسألة مش كده خالص...

قال لي:

- يعني نجيب لك عبد الوهاب...

قلت له:

- لأ.. أنا عايز أم كلثوم...

ضرب جرس من نوع معين دخلوا ثلاثة فراشين شالوني هيلًا بيلًا وع السلم قلت لهم: بس نزلوني هنا أنا عارف السكه

- وروح يا زمان تعالى يا زمان جمال الموجي الأخ الأصغر لسعد الموجي كان أيامها طالب بكلية الفنون الجميله بالزمالك، وكان صديق لفنان الكاريكاتير ناجي كامل، وفي يوم جاتي جمال وقال لي:

- انت مزعل حلمي أمين ليه..؟

وحكي لي حكاية طويله عريضه فهمت منها أن حلمي أمين راح الإذاعه فقال له أمين عبد الحميد إن فيه ولد مؤلف أغاني ناشئ يقول عليك إنك مش ملحن، وإن حلمي زعلان جدًا وكان بيحكي لصديقه ناجي كامل، وبالصدفه كان جمال عند ناجي وسمع الحكايه فقال لهم أنا أعرف هذا الشخص، وجه بلغني فطلبت منه تدبير لقاء عاجل مع حلمي أمين لتوضيح الأمر.

